


FASNACHTSGESELLSCHAFT



BASEL

STAMM

GEGR. 1955

Fasnacht 2012

Moskau(ft) Basel

Do sitzt emoole am ene Oobe spoot
Im Roothuus im ene Sitzigszimmer
Dr erlauchi Gsamtregerigsroot
Und diskutiert ändloos, grad so wie immer.
Das Mool goot s um haissi Sache
Denn d Laag isch ärscht und delikaat
Me diskutiert as d Balgge grache
Bi Wyssem und bi Wurschtsalat.
D Froog isch, wie soll men unseri Stadt vermärte
Wie kaa me rychi Gäldsegg aanelogge?
Wie kööderet me vo dääne ganzi Häärde
As me sy bi uns denn ab kaa zogge?
Wie bringt me Touris grad in groosse Schaare
No Basel, do zue uns an Rhyy?
Wie zwingt me Interessierti zuen ys z faare
Wär kaa do hälfe und het Fantasie?
Es git schliesslig Länder wo me Basel noonig kennt
S git no vyyl Potenzaal fir unseri Stadt
Dert wurd is lohne as men aane rennt
Denn villicht findet ebber unseri Stadt jo glatt?
Es goot also um Basel und sy Renoméé
Unseri Stadt syg im Ussland unbekannt
So mecht me z Basel mee Tourische gsee
Und nimmt zue dämm Zwägg Gäld in d Hand.
S Stadtmarketing hilft fir aimool mit bim Dängge
Und definiert s Russerych als Potenzaal
Wenn d Russe kääme, wurd das yschängge
Drum mietet me in Moskau schnäll e Saal.
Dert stellt men e Event uf d Bai
Und laadet d Russe y zum Hypokras
Uus Basel kemme d Adabei
Samt Guy Morin und hänn vyyl Spass.
Au e Fasnachtsclique darf nid fääle,
Will das jo en Uushänngschild vo Basel isch
So duet me d Russe mit em Arabi quääle
Und die stelle Wodkafläsche uf dr Disch.
Dr Guy Morin samt synere Entourage
Git sich d Ehr und lächlet konsterniert
Es ändet zwoor als Staats-Blamage
Will äär dr Wodka refüsiert.
Denn s Wodkaglas vom Bürgermaischer
Wo iim gredänzt wird als Willkommensdrungg
Wyyst äär zrug, verloo vo guete Gaischter,
Und d Russe mache drum zerscht Stungg.
Zem d Wooge z glette maint unsere Stapi

Mit siessem Lächle wien e Reh
Är sygi mängmool halt e Lappi
Und dringgi lieber Bliemlitee.
Druffaabe bryyst är Basel aa als Stadt
Wo me d Russe gärn willkomme haisst
Denn au fir Oligarche sygi Basel glatt
Will me ne do nid so gnau ins Portfeuille gnaisst.
Nadyrlig mues me Basel russifiziere
Und däne neye Gescht entgeege koo
Denn schliesslig duet me s eschtimiere
As die iir Gäld bi uns wänn loo.
So duet me d Münz- in Ruubelgass umdaufe
Und d Malzgass wird zur Wodka-Strooss
Statt Barfi kasch iiber dr Putin-Square laufe
D Baz wird zur Blocher-Pravda, s isch famoos!
Uus de Fäärimänner wärde Wolgaschlepper
Und s Rhyybord wird zum Moskwa-Strand
Dr Birsig wird zum Basler-Dnjeper
S Roothuus zum *Krasnaja-Dom*, s isch allerhand.
Statt Määlsuppe gits an dr Fasnacht *Borschtsch*
Dr Vogelgryff danzt Kasatschock
Statt Schnägge gits jetz *Blinis* vor sym Horscht
Und d Herzog draht e wyss-blau-rote Unterrogg.
Statt em Unser-Bier gits jetz *Swoi-Bivo*
Me sait *Nastrowie* anstatt Proscht
D libersetzig vom Morin wämmer syloo
Denn dä dringgt lieber Epfel-Moscht.
Am Putin-Square in dr Brötlibar
Dien sich jetz z Basel d Ruski finde
Bi Krimsekt und bi Kaviar
Läärt me sich dr Wodka hinter d Binde.
So kaa dr Morin zfriide sy
D Russe kemme, samt iirem vyyle Gäld
Dobro boschalovat maint äär, derby
Blybt Basel doch e glaini Wält.

D Ladärneusstellig gheert noonig de Russe!
Me kaa die Bracht gratis gniesse und zwoor uff
em Minschterplatz und d Usstellig vo de Wääge-
und Reggwisyte bi dr Kasärne vom Mäntig
Zoobe bis am Mittwoch demorge.

www.muggedaetscher.ch